

MANDI, VÔS DAL FRIÛL

Mandi, pre Checo, vôs dal Friûl! Mandi, onp che tu às incjarnât in te tô vite dut ce che di plui grant e gjenuin, e ancje di scart, il to e nestri popul al puarte intorsi. Se ogni onp al à une sô filusumie, un so naturâl, un so "habitat" culturâl che j dà savôr e che lu cualifiche, disferenseanlu di ogni âtri, te no podín pensâti se no furlan. Une volte tu às dite che, ganbiant aghe, ancje il pes al ganbie di savôr. La tô aghe spirituâl, culturâl, umane e jé stade dome chê furlane. E dai valôrs de furlanetât tu tu sês stât il grant cantôr cu la peraule, cui faz, cun dute la tô vite.

Mandi, onp di sapiense, che tu às savût lei plui in là e plui in dentri di ce che i nestris puars vôi materialisc e vuarps no rivin a viodi. Tu às savût supâ de nestre storie la mevole plui sauride e tu le às sfruçonade par nô predis, par nô scuelârs, par nô popul furlan. Tant tu às savût lâ in alt e in sot te storie e tant tu às savût fânus gjoldi di cheste ricjece e tignînus in bon dal nestri jessi furlans. Cun duc' i limiz, che duc' nus ai àn sinpri ricognossûz. Dome che tu tu às savût fânus preseâ ancje lis nestris buinis cualitâz, lis nestris virtûz. Jessi furlans, cun te, e jé stade une braure, une bandiere, une conquiste. E cuanche duc' (o scuasint) i mestris nassûz in cheste tiere si son butâz te grande trasêf de talianitât, là ch'a podevin sigurâsi e bêz e podê e innoime, tu tu às mantignude la tô frescjece culturâl di riu di mont e il savôr de vite di paîs e la sapience dai vons e dai paris e la senplicitât dai nestris fruz. Senplic come une colonbe e vuait come un serpint tu sês stât, pre Checo. E di te nus reste chel to ridi plen di vite, chel to savê dâj a ogni fat e a ogni robe il so puest te storie e tal mont. Tu nus às insegnât a preseâ no ce ch'al lusive, ma ce ch'al valeve. E a misurâsi cu lis veretâz di fonde, che àn savôr di eternitât e ch'a resistin 'es modis e 'es picis e 'es mafiis ch'a incein e ch'a incjochin e ch'a passin lassant une grande lamiece spirituâl e di vite. Onp di veretâz eternis, onp di valôrs trassendenz, onp di visions di secui. Onp che si e nudrît di storie, onp ch'al à fate storie, onp che nus jude a puartâ indenant la storie. Storie vere, di popul e di glesie, ch'è devente "cuintristorie" e provocazion.

Mandi, onp e predi salvadi, che tu ti sês salvât propit pe to salvadiece. E àn dit che tu eris "scomut". Par cui? Ben par lôr! Par nô no tu eris scomut. Che ansit tu nus às segnade la strade, tu nus às fat lusôr tal nestri scûr, tu nus às passûz te culture e te fede, tu nus às fevelât cu la tô bocje di sapience e tu nus às fat sintî il revoc de peraule di Diu. Tu che no tu sês mai stât un'ore tun paîs, tu às capît che il predi al à di jessi insedât tal so popul come il pes ta l'aghe. E tu às capît, plui di dutis lis cumissions e i vescui, che la glesie o a riscje dutis lis sôs brisculis pe sô int o no vâl nuje e al e miei no vêl, parceche inpen di sâl e devente droghe e inpen di mari che ti nudris e devente madrigne che ti folpee.

Mandi, onp di païs che no tu às vude pore de mafie de sitât e tu j às dade dignitât a di un e a di cheâtre. Tal païs tu nus às fat viodi la comunitât primarole di civiltât, e pe sitât tu às volût no dome panse e tacuin ma ancje culture e sience. E tu ti sês batût cuarp e anime pe universitât dal Friûl.

Mandi, pari di un partît che tu j às volût ben cul afiet gjelôs di une gjate; che ti vignive voe di patafâlû parceche nol veve avonde sgrimie e al tradive i valôrs de tô filosofie politiche. E di cheâtre bande no tu volevis fruçâlû parceche al sares stât come copâ un fî. E cheste paternitât tu le às sintude pardut: te politiche, te glesie, te scuele. Tu murivis pal Friûl, par chel Friûl che ti faseve murî. E cun dutis lis passions e lis gjelosiis e i inproperis dai amanz tu às viodût il to Friûl a colâ, a tornâ a jevâ su, a clopâ, a vendisi, a lassâsi conprâ. Tu varessis volût copâlû; tu varessis volût mangjâlû. E in dute la tô vite la tô disperazion si e conpagnade cu la sperance: che in Friûl, tal ultin, il sintiment e la cussiense de sô dignitât a varessin vude la miei su la cojarie e il meninfôt e la rassegnazion. Il Friûl ti é vignût ancje in sium, chel Friûl ch'al ere il to sium e che ti tormentave ma ch'al ere ancje la reson dal to vivi e dal to sconbati.

Mandi, onp di fede, che tu às provade in te tô cjâr la tentazion di jessi bandonât di Diu e dai onps. E tu tí sês rebelât come Jop, palesant in dut la pengece umane de tô fede, che no à mai disseparât ce ch'al e de anime di ce ch'al é dal cuarp, la dimension spirituâl di chê storiche e tenporâl, cheste vite di cheâtre. Cuanche tu ti sês viodût a lâ denantdaûr, tu às maludide la gnot che tu sês stât cjapât su e la dí che tu sês nassut. Come te plui sante tradizion de Bibie. E dopo di vê bramât e berlât, tu às pleât il cjâf e la schene. E tu ti sês indurmidît tai braz di Chel che nus lanbiche e che nus salve restant sinpri mistereos in ce ch'al fâs. Tu sês muart perdonant e domandant perdon e bussant un Signôr di cjarte come lis nestrîs nônis, tu che tu vevis svualanpât come acuile tes altecis plui sflandorosis de teologje e dal misteri. Grant e piçul, anzian e frut, onp ch'al viodeve indenant un secul e che magari di dongje nol disserneve né personis né câs. Tu às podût permetiti grandis pecjs, parceche tu às vudis grandis cualitâz. Cu la cuâl che nó o sin cjamâz di pecjs ma cence cualitâz o virtúz.

Mandi, cjar e cùcjar dal Friûl. Mandi, patriarcje. Mandi, vos dal Friûl. Di chel Friûl ch'al ere prin di te e ch'al e restât ancje dopo di te. Dome che, dopo di te, nol è e nol à di jessi conpagn di prin. Parceche al à viodude la lûs.